

Prome Minister Wever Croes:

Prijs di awa y coriente no ta subi

Pagina 12



Bubabliplas un biaha mas a kima

Pagina 3



Hospital orguyoso cu e exitoso operacion
aki prome biaha den Reino Hulandes

Aruba prome pais pa uza bril tipo hololens durante operacion

Pagina 2



Hospital orguyoso cu e exitoso operacion aki prome biaha den Reino Hulandes **Aruba prome pais pa uza bril tipo hololens durante operacion**

PA hopi aña caba Dr. Horacio E. Oduber Hospital ta traha cu compania Zimmer Biomet di Hulanda cu ta provee hopi material pa sala di operacion. Dr. Patrick Haime, Ciruhano Ortopedico, a haya e oportunidad unico pa traha cu e prome hololens adapta na Aruba pa un operacion.

Pa Hospital e momento aki ta uno historico, pasobra Aruba t'e prome cu a haya oportunidad di traha cu e aparato aki ya cu na Hulanda ainda nan no ta uz'e.

E aparato innovativo aki ta un bril cu hololens den dje y un microfon. Dr. Patrick Haime t'e prome Ciruhano cu a haci uzo di dje durante un operacion.

El a duna di conoce cu e hololens ta traha cu Wifi y por bay riba internet p'asina otro caminda por mira kico dr. Haime tabata mira durante e operacion.

E bentaha di e hololens ta cu e dokter por tin contacto cu un otro dokter na Hulanda. Si cualkier problema surgi of kier discuti algo e por bisti e bril y papia cu otro.

Durante e operacion e otro dokter por mira esaki via su computer y/of otro aparato y e por duna informacion of conseho 'live'.

Pa por haci uzo di e hololens, mester plania esaki bon, asina dr. Haime a duna di conoce. E biaha aki tabata trata di un 'revisie operatie'.

Esaki ta un operacion unda cu e dokter ta pone protesis cerca hende ora cu nan rudia ta gasta. Aki na Aruba tipo di casonan asina no ta tuma lugar frecuentemente, pero si ta un operacion mas tecnico y dificil.

Pa motibo cu no ta haci esaki frecuente, Hospital ta haya ayudo tecnico for di e compania Zimmer Biomet di Hulanda. E compania ta yuda p.e. cu e protesisnan, di cual ta hopi mas caro y tambe e hermentnan cu mester bin di afo.

E cooperacion cu e compania ta hopi bon y a dicidi di a trece e oportunidad unico aki na Aruba. E aparato aki ta haci cu e distancia ta bira menos ya cu por traha na un forma unico mas cerca di otro cu e bril innovativo aki.

E bentaha grandi pues pa dr. Haime t'e contacto 'live' durante un operacion cu un colega na Hulanda.

Haciendo uzo di e hololens dr. Haime durante e operacion, tabata puntra opinion di su colega na Hulanda pa mira si



nan ta riba mesun liña. Como pashent por mira cu di biaha ta haya un "second opinion".

E dokter na Hulanda tabata sa di antemano di esaki y mester a programa un software den su computer cu ta haci esaki posibel.

E trahamento hunto a bay perfecto, asina el a duna di conoce. Pa Hulanda esaki ta algo cu a pasa pa prome biaha.

A haci un 'try-out' un par di dia prome p'asina segura cu e dia di operacion tur cos lo cana bon.

Pa prome biaha a uza e aparato aki cu a wordo adapta hunto cu e software pa haci esaki posibel. E combinacion aki sigur ta algo positivo y inovativo p'e mundo medico den Reino Hulandes.

Un inversion den esaki lo depende di cuanto y con frecuente lo haci uzo di e hololens. Dr. Patrick Haime ta kere cu e aparato aki e por haci uzo di dje hasta na su policlinica mes. Oscar van der Ende, Commercial Operations Director di Zimmer Biomet, a duna di conoce cu Zimmer Biomet ta un supplier pa hospital pa mas di 25 aña y hunto nan ta purba optimalisa e cuido di pashent aki na Aruba.

P'esaki nan ta purba di desaroya tecnicanan nobo.

Entre Hulanda y Aruba tin un distancia di 8 mil kilometer y diferencia di ora y el a duna di conoce cu trahando cu e hololens ta duna nan e oportunidad pa presencia e operacion en bibo sin cu e especialista mester biaha bin te Aruba. Tambe e ta un oportunidad pa specialistanan Hulandes por mira esaki y pensa hunto p'e mihor cuido di pashent na Aruba. Haciendo uzo di esaki ta pone cu a dal un stap grandi den e optimalisacion di e cuido di pashent. Pabien Aruba cu e gran logro aki.



Despues di algun año

Bubali Plas ta na candela atrobe

Tabata ayera madrugada rond di 3 or, cu autoridadnan Policial y di Bombero a keda avisa cu tin un candela grandi na Bubali Plas. Cuerpo di Bombero a manda un di su unidadnan pa bay inspecciona prome y ora cu a constata cu e candela ta grandi a sali cu mas unidad.

E no tabata facil pa combati, si tuma na cuenta cu Bubali Plas ta grandi y como tin basta dia sin awa ta yobi tur yerba ta seco y riba dje biento tabata supla fuerte, loke a haci cu for di Sasakiweg e candela a “core” te otro banda, esta pa Juan E. Irausquin Blvd, pa despues dal un buelta pa tuma otro parti di yerba seco.

Mirando tur esaki y manera menciona no ta facil pa combati cu awa so, Comandante di Bombero, Eduard de Cuba, a pidi yudanza di DOW pa bin cu algun equipo pisa pa wak con por corta caminda pa bomberonan no por yega asina liher.

E yerba ta basta halto, y si manda hende den dja, ta peliger pa nan mes, pasobra nan lo perde den e yerba y por bira victima di e candela.

E candela feroz aki a causa daño grandi na Flora y Fauna, unda a constata cu hopi bestia cu ta biba den Bubali Plas a muri.

Kico y con e candela aki a surgi, e por ta e.o. accidental, un persona lo a tira un sigaria afo y a sende candela, debi na yerba seco. No ta exclui cu e por a ser sendi intencionalmente tambe, segun Comandante Eduard de Cuba, pero lo mester investiga con e candela a surgi.

GREG PETERSON

Den oranan di madrugada, Presidente di Bird Life Conservation tambe tabata presente na Bubali Plas. Un persona defensor di Flora y Fauna di Aruba, cu dolor na su curazon mester ta testigo di e candela feroz aki, sin por haci mucho.

Secura ta un factor cu ta dificil combati un candela grandi asina. Bomberonan a haci lo maximo. Tur esaki den temporada cu tin hopi broeimento di parha y sigur di esnan e parhanan cu ta move riba distancia largo.

E dolor ta grandi, si mira e.o. con mira tortuga full kima pa no bisa e piscanan cu tambe a muri den e candela aki.

Segun Greg Peterson, den dia e lo lanta un drone pa haya bista real di e daño causa.

Bomberonan a keda practicamente henter dia di ayera na Bubali Plas pa tene e candela bao di control, evitando di lanta atrobe.



Booshi Wever, lider di UPP

Oil & Gas Industry Desk a bira uitzendburo pa sub-contratistanan di Aruba

SIMAN pasa por a tuma nota di un publicacion di e asina yama Oil & Gas Industry Desk na unda ta muestra e tipo di trahadornan cu tin mester den e proyecto di rehabilitacion di e up-grader cu Citgo tin dos aña ta bezig cune.

Na prome bista no ta muestra cu tin nada malo cu esaki, pero Gobierno actual parece di a pega cu e mesun mala mania di corrupcion cu esun anterior, pasobra tin indicacion cu aki tambe tin “gato escondido”, segun Booshi Wever, lider di partido UPP, cu ta hibando un oposicion pafor di Parlamento masha fuerte mes.

Normalmente ta publica e vacaturanan cu tin y esnan cu ta kere cu nan ta cumpli cu e rekisitonan por acudi na DPL of den e caso aki na e O&G Industry Desk. Pero kico nos ta mira? Loke cu ta resalta ta cu DPL/Gobierno a bira un tipo di uitzendburo pa companianan cu ta interesa pa traha den Citgo y ta hasta a bay asina leu di informa of mihó bisá existi di Citgo cu cua compania nan mester traha cune.

Enbes cu e vacatura ta dirigi pa personanan interesa den e posicionnan aki, e ta dirigi na “sub contratista”

interesa den traha pa Citgo.

Esaki NO t’e procedura normal, pasobra semper ta personanan capacita ta ser busca p’e posicionnan, no contratistanan cu por “lever” e personal. Aki e wegá ta sinta pasobra asina aki t’e unico manera legal cu un grupito incluyendo RDA ta haya control y logra hinca e companianan cu nan tin beneficio directo cune.

E mesun modus operandi den M&M su tempo, na unda MEMCO y despues P MEC a wordo privilegia cu ayudo di e mesun “untouchable” di RDA y di e Gobierno anterior.

“Nos a yega di bisa caba cu tin un tipo di Cartel den henter e asunto di e up-grader aki. Ta un par di contratista cu diripiente a sali for di “nowhere”, t’esnan cu ta haya tur e contractnan e ultimo tempo.

E nomber cu ta zona hopi ta esun di GTS Aruba cu segun informacion tin lazonan hopi estrecho cu e “untouchable” di RDA.

E compania GTS Aruba diripiente tin un lista cuantioso di personal local disponibel, mientras NIUN di e personanan aki ta traha p’e compania aki. O&G Industry Desk ta bisa e personanan cu



ta solicita pa nan acudi cerca GTS prome. GTS na su turno ta presenta un lista di experto local na O&G Industry Desk.

DPL/Gobierno di su banda ta forsa Citgo pa traha cu e companianan aki. E compania manera menciona tin laso estrecho y basta directo cu e famoso duo, esta e “untouchable” di RDA y Herbert Mensche.

E ultimo aki a haya un trabou cu tin decenas di ARUBIANO cu tambe por haci esaki. E compania GTS recientemente a haya contracto pa traha e famoso planta di Algea for di RDA sin

ningun destaho publico y keto bay ta encarga cu maneha un planta fantasma cu NO ta operacional, pero cu SI tin personal diario ta huur cu RDA”, segun Booshi Wever.

Ta conoci cu na Aruba tin un cantidad grandi di compania local cu por haci tur e trabounan y duna tur e servicicionan necesario. Ta companianan cu semper a cumpli cabalmente den pasado y Citgo sa esaki, pero ta parece cu awor kier kita pan di e companianan aki pa obviamente favorece nan propio grupo.

“Nos a comprende tambe cu niun contratista local, cu semper a cumpli y cu e experiencia necesario, ta hayando trabou directo. Solamente esnan cu ta pertenece n’e Cartel di RDA ta dichoso pa haya trabou directo.

E Cartel den RDA ta consisti di por lo menos 2 compania. Banda di e compania GTS, e compania “Herbcat” cu aparentemente no tin ningun experiencia den e trabounan di refinaria, ta un otro

dichoso cu tin contracto directo pa huur personal cu RDA.

Obviamente e lo mes ter ta forma parti di e Cartel tambe. No lo straña nos cu ya caba a involucra e Director nobo di Citgo pa sigui cu e fiesta cu tabata existi den e gobernacion anterior.

Di e manera aki hunto cu e “untouchable” di RDA, H. Mensche (kende pa colmo ta un sorto di persona non grata na su propio isla Corsou) y e Director nobo di Citgo, sigui “wheel & deal” na nan antoho y awor cu ayudo di e Gobierno actual tambe. Un biaha ta wordo demostra cu nada a cambia ta solamente a cambia e hende of hendenan cu lo haya parti di e bolo. Si no ta di linksom nan lo haya esaki, ta di rechtsom”, segun Booshi Wever, lider UPP.

Asistencia pa arma di candela tabata trata di dos ilegal

DIASABRA anochi ta drenta un tipo cu na un negoshi na Seroe Patrishi tin un homber ta bebiendo den un bar y tabatin un arma di candela cun'e.

E persona cu a yama a duna un descripcion di e persona aki, kende tabata bisti cu camisa geel y short blanco. E denuncia aki tabata zona straño pero no por a keda sin manda un patruya na e sitio. Polisnan yegando na e establecimiento a via di e porta di glas un homber sinta cu ta cuadra cu e descripcion duna. Asina cu el a mira e Polisnan, el a lanta for di e barkruk y a cana masha lihe direccion di e cushina.

E otro homber sinta banda di dje cu camisa cora y jeans blauw tambe a lanta pura y a cana bay direccion di e baño. A bay prome tras di esun cu a drenta cushina y a logra gare net prome cu e

kier a sali pafo via di e porta di patras. Tabata trata di di PJGO di 27 aña. Mesora el a bisa cu e ta ilegal.

A bay busca e otro den baño y e tampoco por a mostra un tarheta di identidad of paspoort. Tabata trata di AJRG di 29 aña. Ambos tabata bou influencia di alcohol. A dicidi di hiba nan warda pa haya un cuarto gratis. Ora cu nan bira bon a keda di entrega nan na Guarda Nos Costa. No a haya arma den nan poder.

Diasabra tabatin mas ilegal a wordo deteni. Pa casi 4'or di atardi e patruya tabata coriendo riba L.G. Smith Blvd, cerca di Marriott Ocean, ora cu nan a mira un Matiz shinishi ta core direccion nort. A hala nan atencion cu e sicker di aña

no tabata pega. E vehiculo a sigui y el a drenta parkeerplaats di e casino unda cu a dun'e señal pa para. A duna e chauffeur PV pa motibo cu e no tin e documentonan di auto cun'e.

Na banda tabatin un mucha homber sinta cu tabata remarcablemente keto. A puntr'e pa un ID pero e no por a compronde e Polis, kendenan a ripiti e pregunta na Spaño. A resulta cu e no tabatin ningun documento cun'e.

E Polisnan a haya e impresion cu e porta un ilegal y a puntr'e directamente. El a bin admiti cu e tin un luna ilegal na Aruba caba. A tuma contacto cu GNC y a hib'e e oficina di GNC pa mas control di su datonan.

Homber burachi a altera cu Polisnan

Diasabra caso 10'or di anochi diferente persona ta yama informa cu na Dakota tin un homber ta bula dilanti diferente auto cu tabata pasa den e bisindario.

Polisnan a bay na altura di ex Huis van Bewaring riba Avenida Milio Croes unda cu e homber bisti na preto ta spantando e chauffeurnan cu su comportacion.

Ora cu Polis a yega, e homber a crusa bini cerca nan. El a cuminsa papia y a bisa cu e gasolin a caba cune y e ta buscando un persona cu por yud'e hibe cumpra gasolin. Pero mesora Polisnan a sinti cu e homber ta hole fuertemente na alcohol y of otro droga.

E homber tabata blo yega demasiado cerca di e Polis y ta mishi cu su curpa e Polis. E Polis a pidie pa para n aun distancia. E homber a cuminsa bira "onbeschoft" y agresivo. El a bisa e Polis ta e Polis ta yegando demasiado cerca di dje. A puntr'e pa su number pero e no kier a duna su number. Na su luga el a bira puntra e Polis pa su number, y esaki a conteste dunando su fam. Asina el a cuminsa discuti cu e Polis atrobe pasobra gritando el a bisa cu pa ley e Polis mester dun'e su number completo. A trata di calma e homber na diferente ocasion pero sin resultado.

Dado momento el a bisa e Polis "kico bo kier haci anto". Mirando cu e ta basta bou influencia di alcohol y no por a papia cun'e, a dicidi di detene pa 11'or di anochi pa buracheria publico. El a resisti, pero a logra hib'e warda y presente dilanti Fiscal Auxiliar. Despues el a haya un cuarto gratis.



E oncena cu a representa y saca cara di Aruba den e CONCACAF National League Unda nos muchanan a sa di gana Bermuda

Esaki sigur ta un inspiracion p'e siguiente compromiso cu ta dia 16 di october 2018 contra di Guadeloupe.

Masha pabien y Aruba por sigui conta cu Lotto pa Deporte cu ta sigui sostene tur deporte na Aruba

"The best preparation for tomorrow is doing your best today".

**- H. Jackson Brown, Jr.
American Author**

Durante foro global riba tereno fiscal na OECD na Paris:

Minister Ruiz Maduro a defende Aruba riba transparencia fiscal

Y intercambio di informacion cu otro paisnan

DIALUNA Minister di Finansa, Asuntonan Economico y Cultura tabata presente pa atende ‘The Global Forum on Transparency and Exchange of Information for Tax Purposes’ na OECD, Paris caminda a defende e evaluacion cu Aruba a wordo sometí na dje pa midí e transparencia fiscal di nos Pais y intercambio di informacion cu otro paisnan.

Na luna di april ultimo un evaluacion a tuma lugar na Aruba, caminda OECD a waak e disponibilidad, accesibilidad y intercambio di informacion. Aruba aunke un pais chikito, ora cu ta trata di e parti internacional pa haci negoshi, nos pais tambe mester por cumpli cu reglanan internacional mescos cu paisnan grandi. Mester bisa cu ainda nos pais tin su retonan, sigur pa locual ta disponibilidad di informacion.

Den su opening statement na e forum, Minister di Finansa, Asuntonan Economico y Cultura mr. Xiomara Ruiz-Maduro a indica cual ta e retonan di nos pais y kico ta bay haci pa por cumpli cu nan. Mester bisa cu tin asuntonan fastioso pa locual ta e disponibilidad di informacion cu no a wordo atendi debidamente den pasado desde 2011 y awor ta bin preguntanan di paisnan grandi. Pais Aruba mester presenta un plan con ta bay atende cu esaki den cual a indica cu pa fin di aña lo percura pa e legislacion y implementacion necesario tuma lugar, cual ta leynan pendiente manera, entre otro, e introduccion di Buki nr. 2 di nos Código Civil. Hunto cu e mandatario asisti tambe ehecutivonan di Departamento di Impuesto y Banco Central, kendenan lo keda pa e reunionnan. Diabierna proximo lo haya e resultado di e evaluacion di Aruba ariba tereno fiscal y intercambio di informacion.



BO MESTER DI WASTE BUCKET RESIDENCIAL OF COMERCIAL?

ecotech GROUP

YAMA

Mr. Bucket

594-3757
mrbucket@ecotech.dv

20 yrd Big Bucket

15 yrd Junior Bucket

10 yrd Small Bucket



Masha yamativo tabata

Re-eleccion di Alan Howell como Vice Presidente di Parlamento cu 13 voto

Kier men cu un miembro di AVP a vota p'e

AYERA tabatin e ultimo reunion pa sera Aña Parlamentario 2017-2018, unda manera customber ta eligi e proximo Presidente y Vice Presidente, p'e periodo di 2018-2019.

Tabatin presente den sala di Parlamento, un total di 19 miembro, 12 di coalicion y 7 di oposicion.

Den prome ronda pa eligi Presidente di Parlamento, mr. Juan Ady Thijsen a haya 12 voto contra 7 voto cu a bay pa Mervin Wyatt Ras.

Den di dos buelta, cu no tin ningun validez, Edgard Vrolijk a haya 12 voto y Jennifer Arends Reyes, kende a haya 7 voto.

Loke a hala atencion tabata resultado di eleccion di Vice Presidente di Parlamento, unda Alan Howell a pone su re-eligible y a bin haya 13 voto contra di 6 cu a bay pa Jennifer Arends Reyes. Den di dos buelta, tabata Marisol Lopez Tromp, kende a haya 12 voto contra di 7 cu a bay pa Mervin Wyatt Ras.

Pregunta den sala di Parlamento tabata cua miembro di fraccion di AVP lo a vota pa Alan Howell pa dune un total di 13 voto. Speculacion tin hopi.

ALAN HOWELL TA GRADICI

Ayera mainta durante reunion den Parlamento tabatin eleccion pa Presidente y Vice Presidente di Parlamento pa Aña Parlamentario 2018-2019. Parlamentario Alan Howell di fraccion di POR a wordo re-elegi como Vice Presidente di Parlamento.

El a gradici e 13 Parlamentarionan cu a deposita nan confiansa den su persona, es decir, e 12 Parlamentarionan cu ta sostene coalicion y un di fraccion di AVP a deposita su voto di confiansa den Alan Howell pa representanan como Vice Presidente di Parlamento.

E hecho cu un Parlamentario di oposicion a vota pa Alan Howell, no ta algo normal y por hasta wordo cataloga como historico, segun e miembro di POR.

Alan Howell tabatin palabranan di gradicimento special tambe pa su famia, pa su bisiñanan, pa San Nicolas, pa su votadornan, pa su coleganan di partido POR y pa pueblo en general p'e gran sosten ricibi.

El a manda palabranan di pabien tambe pa Parlamentario Ady Thijsen kende tambe a wordo re-elegi como Presidente di Parlamento cu 12 voto na favor.

Finalisando Alan Howell a compromete su mes pa sigui representa pueblo den su totalidad n'e mihor manera posibel tanto paden como pafo di Parlamento.



ANUNCIO IMPORTANTE



IMPORTANT NOTICE

Debi na un presentacion tocante "Team Up!" na nos empleadonan, nos sucursalnan lo ta cera trempa riba e siguiente fechanan:

Diamars September 11, 2018 di 12:00PM adelante:
Noord, Santa Cruz y Wayaca

Diarazon September 12, 2018 di 12:00PM adelante:
Oranjestad y San Nicolas

Na tur sucursal operacion lo reanuda manera customber e dia siguiente pa 8:00AM

Due to an important presentation to our employees on "Team Up!" our branches will be closing earlier on the following dates:

Tuesday September 11, 2018 from 12:00PM onwards
Noord, Santa Cruz and Wayaca

Wednesday September 12, 2018 from 12:00PM onwards
Oranjestad and San Nicolas.

At every branch we will resume operations as usual on the next following day at 8:00AM.



cmbnv.com

f cmbnews

@cmbnv

bobancoamigo

Bo banco **amigo**

KvK brindando oportunidad pa comercio expresa su mes

Exitoso prome Aruba Chamber Town Hall Meeting

DIARAZON 5 di september a tuma lugar na Centro di Bario Dakota e prome Aruba Chamber Town Hall Meeting. E reunion aki organisa dor di Camara di Comercio y Industria di Aruba (KvK) ta pa brinda oportunidad n'e empresario pa por comparti su pensamiento y puntonan di preocupacion pa loke t'e situacion empresarial di Aruba.

KvK kier asina pa comerciantenan contribui tambe na posibel solucionnan p'e obstaculonan cu nan ta confronta cune na momento di haci negoshi.

E orador p'e anochi tabata sra. Cherryldine Buckley cu a structura e anochi den un forma hopi profesional y asina mantene e topiconan al caso y indicando n'e publico cu nan contribucion den forma di un solucion p'e problema ta wordo anota dor di KvK y trece dilanti den e whitepaper cu KvK a traha. E whitepaper ta un documento cu KvK a traha a base di diferente reunion tanto cu sector publico como sector priva riba kico ta importante pa comercio na Aruba.

E Town Hall Meeting tabata uno hopi interactivo caminda cu a duna oportunidad pa haci algun pregunta riba cua KvK a duna contesta p'asina duna e publico presente un idea cu KvK no ta para keto y ta luchando pa logra ehecuta ideanan

cu sigur ta beneficia comunidad y comercio.

Di e forma aki a trece dilanti con KvK a percura pa trece instancianan bancario hunto y asina pusha pa facilita servicionan di transaccion di cual discusionnan pa cu online payment ta den un fase avansa.

Tambe cu KvK a urgi Minister di e Gobierno anterior pa pone un moratorio riba supermercadonan mirando cu dor di falta di control no por haci mucho cos pa maneha e cantidad di supermercadonan na Aruba.

KvK ta contento cu e moratorio a drenta na vigor y cu ainda ta vigente y cu e decision aki tin apoyo y comprension di pueblo.

Hopi di e puntonan cu a bin dilanti ta resona cerca KvK. Aki por menciona puntonan di preocupacion manera burocracia incoregibel, competencia ilegal, bouwvergunning cu no ta keda cla of ta tarda mucho hopi, exigencianan extravagante y permisonan cu hopi contratiempo.

Tur esaki ta duna KvK e confiansa cu conse-



honan cu kier trece dilanti cerca Gobierno ta conta cu apoyo di e comerciante.

Asuntonan di lanta negoshi, concurrencia di negoshinan ilegal, crea level playing field, incentivanan p'e profesional, uso di tecnologia, e-commerce y negoshinan online ta algun di e puntonan cu mester su debido atencion.

Durante e anochi KvK a tuma nota di e sugerencianan cu a bin dilanti cu e intencion di facilita comercio. E intencion ta p'e forma aki duna mas forma na yega na solucionnan practico pa problema y obstaculonan existente.

KvK y su Directiva ta hopi agradecido n'e personanan cu a tuma nan tempo pa asisti n'e reunion aki. Alabes KvK ta hopi satisfecho y ta aprecia hopi e

participacion durante e prome Town Hall Meeting.

KvK lo haci bon uso di e informacion cu a wordo comparti e anochi aki. Intencion di KvK ta pa continua cu eventonan similar cu ta duna oido n'e pueblo empresarial. Di e forma aki ta canalisa e preocupacion y tambe e solucion cerca Gobierno y Parlamento.

E ta keda e ora na nan pa dicidi si nan ta mira e conseho como algo

cu nan por ehecuta y cu por contribui na bienestar general.

Pronto KvK lo presenta un update riba su white paper y lo percura pa envolver sector priva y sector publico mirando cu pa yega na exitonan practico e ta necesario pa uni forsa y enfoca riba un solo meta.

Si tin sugerencia por semper tuma contacto cu KvK y trece esaki dilanti.



Tin hopi keho, pero kier enfoca riba solucion den e white paper. E white paper actual ta disponibel riba e website di KvK y por download esaki for di nos website via www.arubachamber.com/downloads/reports.

Opositornan politico mes ta ripara cu **Gobierno anterior a haci un eror hopi grandi di kita tanto helicopter como radar for di polis**

SEGUN Minister Bikker

E necesidad pa Aruba tin su propio helicopter y radar pa cuerpo policial, ta birando mas y mas evidente segun Minister di Husticia mr. Andin Bikker. Si mira e fluho di persona cu ta yega Aruba su costa sin ta invita y den un forma ilegal, ta birando preocupante si mira e situacion na pais Venezuela. For di tempo cu a anuncia, cu den Plan di Gobernacion ta bay pone como prioridad pa bin bek cu un helicopter y un radar pa cuerpo policial, tabatin cierto resistencia di parti opositornan politico. Pero awor den Parlamento ta haya pregunta netamente for di opositornan politico ta ki dia e radar y helicopter ta bin. Segun e mandatario, mas y mas persona ta cuminsa ripara y incluyendo opositornan politico cu den gobierno anterior a haci un eror hopi grandi dor di elimina e helicopter y e radar cu cuerpo policial tabatin. For di declaracionnan haci pa comandante di Warda Nos Costa, e mes tambe a indica cu tur ayudo cu ta posibel ta bon bini, pasobra si Aruba tabatin su propio helicopter y radar pa polis conhuntamente ta trahando hunto. Diabier-

na ultimo tabatin un mainta di informacion na Centro di Husticia na Macuarima caminda un gran cantidad di persona a acudi pa haya informacion riba e destaho publico cu ta andando. Segun Minister Bikker, e speransa ta, cu den un par di siman cuminsamento di october por finalisa e proceso y rapido despues di algun siman por tin e servicio di un helicopter pa cuerpo policial. Pa loke ta e radar, ta percurando pa e proceso y observando e ley di contabilidad pa asina prome cu fin di aña Aruba tin su propio radar pa cuerpo policial.



Ricibi un tasa di interes reduci pa bo hipoteca, ora bo aplica prome cu 30 di September, 2018!

- Sin gasto administrativo inicial
- Te cu 95% di financiamiento*
- Te cu 35 aña pa paga bek*

- Credit Card pre-aproba cu 5000 punto di bonus



CALL
522-5600



POST
cibcfib



TWEET
cibc_fcib

Switch bo Cuenta di Spar

- Interes atractivo te cu 2.25% (APY 2.27)**

Tuma contacto cu un di nos Especialista di Hipoteca awe mes na 522-5600 of bishita cibcfib.com

Banking that fits your life.®



FirstCaribbean
International Bank

*Condicionnan adicional aplicabel pa prestamo. **Offer ta valido solamente cuminsando for di un suma di AWG 1000,00 of mas! APY (Annual Percentage Yield): ta e percentage di interes cu ta refleha e suma total di interes ricibi riba un deposito tumando en cuenta e efecto di calculacion di interes ricibi. The CIBC logo and "Banking that fits your life.®" are registered trademarks of Canadian Imperial Bank of Commerce, used by FirstCaribbean International Bank under license.

Banda di ex Bushiri Beach Hotel

Auto ta dal peaton lagando e seriamente herida

DIADOMINGO den careda di 11'or y mey di anochi, un homber ta baha for di bus y ta crusa caminda sin pone tino cu tabata biniendo un Toyota Yaris Blanco cu velocidad halto. E auto ta dal e homber lagando e seriamente herida.

Aparentemente e chauffeur no por a haci mas pa por a evita e accidente aki.

Despues di e impacto fuerte e homber a keda benta boca bou riba caminda. Na prome instante a wordo bisa cu ta trata di un hit and run, pero e chauffeur a bira bin bek n'e sitio. E homber a ricibi hopi golpi, aparentemente e lo a fractura su pia y brasa, tambe el a ricibi golpi na cabes y aparentemente e lo a haya sla paden.

Esnan n'e sitio mesora a bati alarma, Polis y Ambulance a presenta n'e sitio y personal di ambulance hopi liher a prepara e victima y a transporte cu hopi urgencia pa hospital.

Varios unidad di Polis tabata presente, Departamento Tecnico di Polis y Especialista di Trafico tambe a wordo pidi n'e sitio.

Despues cu e accidente a sosode, Polis a cera e caminda principal di e turbo rotonde p'e cruzada di lusnan di trafico na Fatum y pa mas o menos 1'or y 20 di madrugada, ora a caba cu e investigacionnan necesario a habri e caminda bek pa trafico.

E auto cu a alcanza e peaton a wordo confisca pa autoridad pa mas investigacion. E impacto tabata hopi fuerte, mirando cuanto daño e auto a haya y tambe e situacion critico cu e victima ta den. E victima ta interna na hospital y su situacion ta critico.






HERMUS
RIJSCHOOL NV
 5943263 / 5826732
 Hermusrijkschoolnv.com
 Sividivi 1-C

Afl.

191



Presidente di ASU, Gerald Franca

ASU no tabata y no ta den proceso pa adkeri ningun facilidad Deportivo

Contradiendo asina Minister Dangui Oduber

“**RECIENTEMENTE** mi a tuma nota di un declaracion di Minister di Deporte, Dangui Oduber cu Fundacion Facilidatnan Deportivo (FFD) supuestamente lo kier traspasa facilidatnan deportivo pa Aruba Sport Unie (ASU).

Pa motivo cu e declaracion aki a cuminsa biba un bida riba su mes, mi a dicidi pa duna e siguiente aclaracion”, segun Gerald Franca, Presidente di FFD.

ASU no tabata y no ta den proceso pa adkeri ningun tipo di propiedad y/of facilidad deportivo. Al contrario, den ultimo añanan ASU a traspasa un di su facilidatnan deportivo, Joe Laveist Ball Park (JLBP), pa FFD y a keda solamente cu Centro Deportivo Libertador Betico Croes (CDBC) como su cede.

Mester menciona compleho Deportivo Guillermo Prospero Trinidad tambe cual a cede na Lotto pa Deporte como garantia p’e inversion den renobacion di e stadion,

CDBC a wordo traspasa pa ASU dor di Gobierno y JLBP dor di LAGO. Aruba Sport Unie a wordo funda na aña 1941 como un organo deportivo general cu ta consisti di e diferente Federacionnan Deportivo di Aruba.

E meta di ASU ta pa promove y facilita deporte na Aruba. Actualmente ASU ta wordo forma exclusivamente dor di 35 Federacion Deportivo Arubano y Directiva di ASU ta wordo eligi dor di e Federacionnan afilia segun e proceduranan cu su Statuut ta stipula.

Ta bon pa subraya cu ASU ta un organo deportivo autonomo, pa cual motibo, nunca den pasado y actualmente, ni Idefre, Ibisa, Gobierno o Lotto pa Deporte tin representacion den Directiva di ASU. Conforme Statuut di ASU t’e asamblea o reunion general t’e organo mas halto di ASU. Mantencion di e propiedadnan y otro gastonan di operacion di ASU ta wordo subsidia principalmente dor di Gobierno.

Segun Gerald Franca, Lotto Pa Deporte tambe a yuda den e mantencion y inversion. E Federacionnan afilia ta paga un contribucion di Aw 150,00 pa aña. Ta bon pa tuma nota tambe cu, segun e statutan di FFD, un traspaso di propiedad pa cualkier otro entidad of persona, ta rekeri aprobacion di unanime di Directiva di FFD cu ta consisti di representante di Minister, representante di Lotto pa Deporte y representante di ASU.

P’e motibonan menciona anteriormente, Gerald Franca ta lamenta e declaracion di Minister Dangui Oduber comokiera cu e Minister di Turismo, Salubridad y Deporte a basa su mes riba un rumor infunda e incorrecto.



Ta un lastima cu ningun di e conseheronan di e Minister no averigua y/o asegura nan mes debidamente di un que otro pa evita cu declaracionnan tendencioso ta daña e imagen di Minister y di Deporte na Aruba.

Semper ASU a haci esfuerzo enorme pa mantene un posicion autonomo y neutral, pasobra ta conoci y proba mundial y localmente, cu unabez cu politica mete cu deporte por lo general ta daño so ta wordu causa na deporte.

“Criticanan constructivo ta welcome den deporte y ta yuda motiva pa haya concuidananan capacita y cu no tin un agenda scondi o interesnan personal como meta dispuesto pa asumi responsabilidad den mundo deportivo.

Esaki ta un motibo y razon sumamente importante. Directiva di A.S.U. ta desea y ta recomienda prensa pa verifica y investiga e tipo di noticianan falso (fake news) aki, particularmente si e Minister mes ta bisa cu e ta un rumor.

Door di sigi plama e tipo di noticianan aki sin mas, bo ta haci bo mes complice na venena y daña deporte na Aruba den tur sentido di palabra.

Nos deseo y meta ta pa tur hende sin importa edad of unda nan ta biba riba e pida baranca aki tin e posibilidad pa haci deporte cu e ta gusta”,. Gerald Franca di Presidente di ASU a finalisa.

Contrario na speculation y informacionnan incorrecto: **Prijs di awa y coriente lo no subi**

Teniendo cuenta cu constantemente ta sali informacionnan incorrecto tocante prijs di awa y coriente, y e cantidad di preguntanan cu Gobierno ta haya si e prijs lo subi of no, Prome Minister Evelyn Wever-Croes a informa cu esaki no ta e caso.

Informacionnan cu Prome Minister a ricibi ta cu esfuersonan cu a wordo haci te cu awo, a conduci cu prijs di awa y coriente no mester subi. Esaki ta contrario na e speculationnan in informacionnan incorrecto cu tawata bayendo rond ultimamente.

Esaki ta contrario tambe na e prijs di crudo cu ta fluctuando bastante y bayendo den e direccion di aumento. Tambe e gastonan imprevisto cu tawatin pa e situacion di humana Astec lo por a influencia prijs di awa y coriente. Sinembargo a conclui cu e prijsnan no mester subi.

Prome Minister a duna di conoce cu pa e siguiente lunanan nos dilanti, e situacion segun calculacionnan ta bou di control por lo tanto no mester aumenta e tarifanan.

“Mi ta spera cu esaki lo trece tambe e tranquilidad den comunidad. Esaki no ta facil y ainda no a caba di atende cu e problema.

Gobierno no por garantiza cu prijsnan nunca mas lo subi y ainda no por indica exactamente ki dia e lo baha. Gobierno tin e responsabilidad di atende cu cada reto manera nan presenta. Pero pa e siguiente lunanan, nos lo no tin e preocupacion si e prijs lo subi. Gabinete Wever-Croes lo sigui lucha pa yega na e momento na unda lo baha e prijs di awa y coriente considerablemente”, Prome Minister a duna di conoce.



Minister Ruiz Maduro a reuni cu Cinex na Corsou



SIMAN pasa Minister di Finansa, Asuntunan Economico y Cultura mr. Xiomara Ruiz-Maduroa haya bishita di director di CINEX Corsow, sr Ramon Koffijberg. Durante un reunion ameno a elabora riba e esfuersonan cu ta wordo haci na Aruba y Corsow pa atrae inversionista. Tambe a conversa riba e reto nan cu nos tin na nos Paisnan pa por atrae

inversionista. Un reto sigur ta e tempo cu ta tuma pa por haya e permisionan y cooperacion necesario di instancia gubernamental. CINEX tin presencia na Corsow, Colombia, Merca y Hulanda. E mandatario ta spera di por tin pronto hopi mas cooperacion entre CINEX y ARINA cual ta e agencia cu ta yuda na atrae inversionista pa nos Pais.

Chines hungando cu 100 falso den Casino

Diasabra pa 2.20 di madrugada Central di polis ta manda e patruya na un casino na un hotel grandi pa un incidente unda cu biyete falso a wordo descubri.

Na e sitio e Polisnan ta wordo aserca door di e homber di inicial M., kende ta declara di ta Casino Manager y a hiba nan na e persona en cuestion.

E señora di inicial L., a declara cu e ta sospecha cu el a haya e biyete di 100 dollar na su supermarket, di cual e ta doño. E mes no tabata sa cu e biyete ta falso. El a splica cu el a bay hinca e biyete den un di e mashinnan pa e hunga, pero e mashin a nenga di acepta e biyete. El a bay na caha pa pidi nan si nan por cambia e biyete p'e pasobra e mashin no kier tum'e. Ora di control e teller a bin descubri cu ta trata di un biyete falso.

A confisca e biyete di 100 dollar y entregue na Polis técnico.

==--==

Chauffeur a pidi asistencia pa otro chauffeur cu arma

Diasabra den oranan di madrugada Central ta manda patruya di Playa na Seroe Preto (Paradera) p' aun problema y unda cu un di e partidonan involvi lo tin un arma di candela den su poder.

Polisnan na e sitio ta papia cu e señora di inicial T, kende a conta cu e tabata coriendo na altura di Wendy's Cura Cabay y a subi caminda sin duna preferencia na un Toyota Altezza blauw. E Altezza a logra evita un accidente pero a sigui core su tras.

Ora cu el a yega na e cas na Seroe Pretoe, e Altezza a bin dal riba dje y su amigo, di inicial C. El a bisa nan cu e lo tira nan mata. E chauffeur desconoci a keda core pasa diferente biaha dilanti di e cas. Ora cu e patruya tabata na e sitio a mira e Altezza pasa eydilanti. Nan a a dun'e ordo pa para y a bay papia cun'e. El a duna nan permiso pa listra su vehiculo pero no a haya arma di candela.

M. a declara cu e tabata na altura di Wendy's Cura Cabay ora cu un Suzuki Alto blanco a subi caminda sin dun'e preferencia. E chauffeur lo a expresa palabranan menos bunita den su direccion y esaki ta e motibo cu el a dicidi di sigui su tras. Polis a intermedia y a trece tranquilidad bek. T y C a wordo bisa cu si nan kier entrega un keho, nan por pasa na oficina di Recherche.

==--==

Choller a menasa su mama

Diasabra mainta tempran Polis mester a intermedia den un problema cu un chokker femenino a causa na cas di su mama. Pa 9.30 di mainta e Polisnan di Playa a wordo manda na un cas na Olijfstraat pa un you muhe rebelde, esta e conoci di Polis JK. Yegando na e sitio e no tabata presente mes. E ta sabi. Ta parce cu e no gusta libertad pasobra e tin apenas un siman afo ora cu e hecho aki a tuma luga.

Segun por a compronde, el a bay molestia su mama pa placa (probablemente pa droga) y ora cu no kier a cumpli cu su deseo el a hasta menasa di kibra e bentana di e camber di drumi. Pero asina cu el a tende cu Polis ta na caminda, mersora el a bay for di e sitio. Nan a buske rond, pero no a topa cune.

==--==

Chucky su kabel di trot a kibra

Pa mas o menos 14:30 di atardi SuperRhib di Guarda Costa tabata patruyendo bandi Oranjestad. Pasando bandi entrada di Oranjestad parti West nan a mira un boto cu 3 hende riba dje ta zwuai man.

E SuperRhib di Guardacosta a aserca e boto aki pa mira kico ta pasando. E capitán di e boto "Chucky" a indicá cu nan tin problema cu kabel di trot cu mester a kibra.

E boto di Guardacosta a tuma e boto aki riba tou y hiba nan na Varadero.



Turista burachi ta insisti cu el a wordo ataca den lobby hotel

Diadomingo Polisnan a bay atende cu un turista cu tabata existi presencia di Polis den oranan di madrugada. Pero e supuesto denunciante tabata asina bou influencia cu na final el a wordo conseha pa warda te siguien- te dia ora cu e ta bon pa entrega keho si e ta desea esey.

Tabata personal di frontdesk di un hotel grandi kende a yama Polis pa informa nan cu dos turista kier entrega keho contra un taxista.

Pa 1.35 di diadomingo madrugada e Polisnan di Noord a bay na e hotel grandi unda cu e declara ta bisa cu e kier mira e filmacionnan den lobby pasobra e lo wordo a ataca door di un homber desconoci. E muhe, MKO di 25 aña, a declara e tabata hunto cu un amiga y nan a coy un taxi for di e hotel pa un restaurant y despues a coy otro taxi pa bolbe hotel. Na caminda a surgi un diferencia di opinion cu e taxista riba e suma of tarifa cu nan mester paga pa e trip y cos a manera sali for di man. Na final e taxista a bisa nan cu si nan no ta di acuerdo cu e tarifa nan por sigui na pia y esey ta loke cu nan a haci tambe.

Nan a yega e hotel y den e lobby nan a wordo ataca door di un homber desconoci. Pa e motivo aki nan kier mira e filmacionnan di e lobby pa sa kende e persona aki ta. Nan ta sospecha cu por ta trata di e taxista.

Ora cu e Polisnan ta papia cu e turista femenino a constata cu e tabata basta bou influencia di alcohol. E tabata keda insisti cu e kier mira e filmacionnan, pa mira ken e persona ta y e kier entrega keho. Pero mirando su situacion, el a wordo conseha pa spera cu e ta bon na tino. A conseh'e pa tuma contacto cu strandpolitie riba loke cu a pasa.

==--==

Mientras homber ta traha su auto ta wordo destrui

Diadomingo den oranan di madrugada e homber L di 25 aña, kende tabata trahando den Casino, a yama Polis pa informa cu su auto a wordo destrui staciona den parkeer- plaats.

E informe cu a drenta ta bisa cu personanan a tira riba un auto. Pero ora cu e Polisnana yega na e sitio a topa cu un Honda Accord blanco cu dos homber para banda di dje. Un di nan ta bisa di ta e doño y e otro ta un amigo di dje, kende ta esun cu a bin constata cu e auto a wordo destrui. A constata cu no tabata trata di tiro pero destruccion cu algo pisa.

Nan ta papia cu e doño, kende a bisa cu rond di 1.55 su amigo a bin buske den e casino pa informe cu su auto a wordo destrui. El a core bay wak su vehiculo den e parkeerplaats y a mira cu desconocinan a kibra e glasnan di dilanti, patras y na banda di e chauffeur. Segun e ta bisa, e no tin problema cu ningun hende. E ultimo biaha cu el

a mira e auto ta ora cu el a staciona aki pa 6.45 di atardi.

E amigo di dje di inicial D a bisa cu oa mey anochi e tabata hunto cu un amiga y nan a drenta e parkeerplaats pa mira si L. ta trahando. Nan a mira su auto staciona y e tabata bon. El a trata di yama L pero esaki no a conteste. Nan a sigui core y a bay un casino den bisindario. El a hunga durante mey ora riba e mashinnan y despues a dicidi di bay bek e hotel unda su amigo ta traha. Nan a yega pa 1.50 y ora a mira cu e bentanan di e auto di L tabata destrui. Ora cu el a mira e parti dilanti kibra el a kere cu ta tiro a causa esaki. Mesora el a bay den e casino pa avisa L di e sucedido.

E glasnan probablemente a wordo kibra cu un obheto duro.

==--==

Muher maltrata cu un boter den baile

Den oranan tempran di mainta un señora ta informa Polis di algo cu a sosode cune mas den oranan di madrugada ora cu e tabata bailando na Olde Molen.

Rond di 6'or di mainta Central di Polis ta manda patruya di Noord na un hotel chikito unda un señora a yega cu un cap na su cabes. Ambulance lo ta na caminda caba.

Na yegada na entrada di e hotel den construccion e señora no a wordo haya. E ambulance a bay na e club nocturno den bisindario (Olde Molen), pero no a topa cu e victima tampoco. Algun rato despues ta drenta un otro yamada cu e muhe a yega bek na e sitio. Tabata trata di e mesun muhe cu tabatin problema cu un otro señora na South Beach mas tempran den oranna di anochi. Esun herida a keda di entrega keho dialuna contra esun cu a dal'e. E sa ken e ta pero no por corda e nomber.

Segun el a bisa Polisnan, e tabata baila ora cu di repente e muhe a dal'e cu un boter na su cabes. E no tabata kier pa ambulance transporte y a keda cu e mes lo bay hospital pa busca ayudo. Tabata trata aki di D di 26 aña.

==--==

Robo di truck y television- nan grandi for di hotel

Diadomingo anochi empleado di un hotel grandi ta entrega keho di robo di entre otro varios television di 42 inch.

E patruya cu a bay na e sitio a papia cu e homber di inicial R (51), kende a entrega keho di joyriding y robo di diferente articulo.

E ta bisa cu dia 8 di september rond di 8.30 di anochi su empleadonan a laga e deposito cu ta wordo gehuur door di Property Improvement People intacto atras y na lock. Den e deposito tin diferente material perteneciente na e hotel.

Den e magazijn, na e banda cu ta carga mercancianan, a laga un Hyundai HD 65. E auto aki tin problema cu motor y mes-

ter bay garashi pa wordo drecha. Segun e trahado di inicial K., e yabi di e vehiculo aki tabata riba e microwave na entrada di e deposito.

E trahado cu a yega mainta a informa e hefe cu e roldeur na entrada no tabata completamente cera. Ora di a tira un control a constata cu desconocinan a kibra un bentana na e parti panort di e deposito cu un piedra. Probablemente via di e bentana aki a drenta e deposito. A haya e piedra ainda eybou.

Den e deposito tin smart TV cu ta dañá, pero tambe tin basta television di 42 inch cu ta intacto y husto esakinan a bay cu nan. E televisionnan dañá a wordo laga atras. Na e caha tabatin un tablet di marca "Asus: cu e desconocinan a bay cune tambe. E tablet ta wordo uza pa registra e mercancianan cu a wordo bendi y ta hinke den e sistema. Den e cashi di paña tabatin dos cahita cu placa cu nan a bay cu nan. Den un di nan tabatin 500 florijn. Tur cos a wordo hinca den e truck cual yabi a wordo cogi for di riba e microwave.

Tambe nan a bay cu circle saw, piesanan di television, un sofa shinishi; 2 schroefmachine; remote y e truck mes.

==--==

Denuncia di tres menor pidiendo placa band'e hotelnan

Diadomingo den oranan di atardi tin un melding straño cu a wordo haci na Polis. Segun e persona cu a yama, tin un mucha homber y dos mucha muhe canando banda di Screaming Eagle pidiendo placa pasobra nan tin hopi hamber.

Ta trata di tres menor, kendenan tabata pidi e hendenan den e bisindario pa placa pasobra nan tin hamber y sed. Nan a cana bay direccion di Costa Linda. E mucha homber ta bisti carson cora, un di e mucha muhenan cu short blanco.

E polisnan a core den henter e bisindario, pasando poco-poco dos biaha riba e beach for di Screaming Eagle y tambe den bisindario di Coco-Loce Bar banda di Costa Linda. A mira difernete famia na lama pero niun hende a bati alarma cerca e patruya pa e caso menciona.

==--==

Tiro scucha den Weststraat

Diadomingo den oranan di mey anochi un biaha mas ta drenta melding di tiro cu a wordo scucha den bisindario di Weststraat.

Polis ta wordo den e area di Weststraat unda cu supuestamente e tironan a wordo scucha. Na altura di "Stop & Go" nan ta papia cu e conoci di Polis di inicial F. El a bisa nan cu el a scucha tiro for di e area unda cu e Haitianonan ta hunga domino (enfrente di Keke).

E patruya a bay na e direccion indica pero no a topa cu algo particular. Den Elleboogstraat nan ta papia cu e choller C. E tambe ta bisa cu el a scucha dos tiro duro pero no sa di ki direccion el a bini. E Polisnan a controla den Weststraat y bisindario pero nada special.

Dos auto a wordo destrui door di desconocinan

Diabierna ultimo algo pasa di mey anochi un señora ta presenta na Warda di Polis pa entrega keho di destruccion.

E ta bisa cu dia 6 di september rond di 12'or el a bay su trabou. El a laga su auto intacto atrás dilanti su cas. Tabata trata di un Hyundai Santa Fe color blanco. Dia 7 di september el a yega cas bek pa 12.40 di madrugada y a constata cu e tirenan banda robes dilanti y patras tabata destrui. Segun e denunciante, e tin un sospecho ken por a haci e cos aki, pa motibo cu e tin problema cu un pareha.

Pa 12.42 Polis ta wordo den John G. Emanstraat pa un caso similar di destruccion. Nan ta papia cu e homber di inicial R. E ta bisa cu dia 6 di september pa 5'or di atardi el a laga su auto dilanti Stichting Rancho y intacto y na lock. Ora cu el a bolbe eyan pa 12.30 (madruga) el a mira cu desconocinan a kibra e windshield cu un piedra. Denuncia a wordo tuma.

==--==

Pareha turista a pleita y un a wordo deteni

Dia 7 di september pa 4'or di madrugada Central di Polis ta manda un patruya na un condominium riba Juancho Irausquin Bkvd pa un pareha cu tin problema cu otro.

Nan ta papia na e sitio cu e señora di inicial S., kende ta casa cu e turista Aleman di inicial Z. E muhe a bisa cu e tabata drumi ora cu di repente el a spierta y a mira su casa sinta riba cama ta coba den su cosnan. Ora cu e ta puntra e homber kico e ta haciendo, su unico reaccion ta cu el a cuminsa hari y no a conteste.

Door di esaki a surgi un discusion entre nan dos. E homber a coge na su brasa y a pone pafo di e camber di e hote. Despues di esaki e homber a hiba su cosnan, di e muhe, pafo y a tira nan na suela. Ora cu e tabata recogiendo su cosnan el a constata cu su paspoort Aleman y su yabinan di cas no ta den su tas. E paspoort el a warda den un washandje berde den su tas. Y su celular el a hay'e den e piscina. Probablemente e homber Z a tira su celular den e pool.

E Polisnan a bay papia cu e homber, pero e ta bisa no sa di nada di paspoort ni di e celular, y tampoco di e yabinan di cas. El a permiti e Polisnan y S drenta e camber pa busca e paspoort, pero no a haya e documento. Ora e Polis a bay tira un bista door di bentana, el a mira e paspoort tira abou hunto cu e washandje. A dicidi di detene e homber pa 5'or di madrugada y a transport'e pa Warda di Polis.

==--==

Den dia a scucha tiro na Macuarima

Miembro di KPA mes cu tabata den Santa Cruz diabierna den oranan di merdia ta bati alarma pa tironan cu el a scucha. Dia 7 di september pa 1.40 di merdia e patruya di Santa Cruz ta wordo para door di un colega pafo di servicio, kende ta bisa di a scucha dos tiro di arma di candela den bisindario di Macuarima.

E patruya a bay tira un bista den e area indica, y a dal algun rond. Tambe nan a papia cu un habitante cu ta biba banda di Dowco. Pero el a bisa cu e no a scucha nada door cu e tabata drumi y el a caba di lanta. A keda core rond pero sin cu nan a wordo aserca door di otro hendenan.

==--==

Playstation horta na cas na Sabana Basora

Polis ta wordo pidi pa presenta diabierna den oranan di atardi na un cas na Sabana Basora, cu a ricibi bishita di ladronnan. E Polisnan na e cas ta topa cu un mucha homber menor di ead. El a conta nan cu desconocinan a drenta paden pasando via di e bentana di baño.

E ladron(nan) a bay cu un playstation y algun wega y tambe algun joyas. A bisa e hoben pa informa su mama y pa yama Polis ora cu e yega cas pa duna keho. Mas laat berdad e mama a yama y un patruya a bay tuma e keho.

==--==

Tent di misa a wordo horta

Ladronnan desespera sea pa haya cos pa horta of bende despues of sinberguensanan cu ta uza e cosnan horta nan mes, no ta respeta ni misa. Diabierna un misa a bira victima di ladronnan.

Pa 4'or di atardi ta presenta na Warda di Polis e homber di inicial K pa haci entrega di keho di robo di un Arabian Tent (4.57x4.57 meter). El a declara cu dia 6 di september e tent tabata dobra, poni bou di e trapi Iglesia di Dios na Hooiberg, den oranan di mainta.

Anochi, rond di 7.30 nan a bin constata cu e tent a disparce. E ta un tent cu nan a haya di donacion for di Merca, pero mester a paga 1500 na invoerrechten. Nan a bay solamente cu e tent, y e tubonan di hero a laga atras. E denuncia a wordo tuma.

==--==

Dos homber Venezolano sospechoso deteni

Diabierna ultimo tabatin e caso unda cu dos homber, di nacionalidad Venezolano, a pasa haci sospechoso na algun negoshi pa cual alarma a wordo bati. Den un persecucion rapido nan a wordo deteni.


Rond di 4'or di atardi personal di Used Cars, cerca di Do It Center na Savaneta, ta mira un auto di huur staciona na un forma sospechoso. Un rato despues un muhe a Sali bou gritamento for di Do it Center cu tabatin un atraco y cu e hendenan a bay direccion abou. Tabata trata di un Hyundai Accent cu glas getint. Despues a resulta cu no ta un atraco. E duo tabata trata di confundi cahera di diferente negoshi pa haya mas placa di cambio cu nan lo mester haya. Esaki nan a haci of trata di haci na diferente negoshi di Savaneta bin abou.

Mesun cos nan a trata di haci na Macro Supermarket. Segun e homber C., via di un chatgroup el a haya potret di e dos Venezolanonan cu tabata haci sospechoso na diferente negoshi. Ora cu a mostra e cahera potret di e stranheronan, un di nan a bise cu nan a atende un di nan algun rato prome.

Prome a dicidi di controla e biyetenan di 100 florin pero tur tabata bon. Ora cu a bay wak e transaccionnan riba video a resulta cu un di e Venezolanonan a cumpra un paki kuki y a duna e cahera 100 florin. Despues el a tuma e 100 florin bek y a duna e cahera placa larga. Despues e cahera a debolbe 96 florin. E otro Venezolano a cumpra un caha di webo y a oaga cu 100 florin. E tambe a tuma e biyete bek y a duna e cahera placa larga. Pero e cahera tambe a debolbe 96 florin.

En conexion cu Dia Nacional di cacho

Turistanan di Riu Palace Antillas encanta cu show di cacho di SGT Peppers Friends



EN conexion cu Dia Nacional di Cacho, Riu Palace Antillas kier a mostra nan sosten cu SGT Peppers Friends, e shelter cu ta rescata puppies, cacho adulto y pushi for di caya door di organisa un show cu e cachonan na Riu Palace Antillas. E boluntarionan di e shelter tabatin e oportunidad pa splica nan trabou y e proceso di adopta na e bishitantenan como laga nan keda encanta cu e triki- y weganan cu e 8 cachonan cu nan ta cuida. Turistanan a disfruta di e oportunidad pa caricia e cachonan y haya sa mas di e shelter.

E boluntarionan di SGT Peppers Friends y empleadonan di Riu Palace Antillas a parti flyers cu informacion di e shelter. Tambe e shelter a trece un box pa turista haci donacion. Apart di disfruta e show, turistanan tabata interesa den aspectonan manera proceso di adopcion di bestianan. Lisa Roos, un boluntario di SGT Peppers Friends, a indica cu nan tin mas o menos 150 bestia den casnan "foster", pero tambe nan ta purba siña hubentud di Aruba con pa trata bestianan y e

importancia di opera nan.

Tur hende por pasa na SGT Peppers Friends y adopta sea un cacho of un pushi. Boluntarionan ta percura cu e cacho- y pushinan ta vacuna, nan tin chip y opera. Riu Palace Antillas y Riu Palace Aruba p'e donacion di 10 saco di cuminda, un yudansa cu e shelter ta balora hopi como cu ta importante pa nan ricibi e sosten di compania local.

Pa mas informacion con pa adopta un cacho of pushi por bay riba www.sgtpeppersfriends.com.

RIU Hotels & Resorts a habri Riu Palace Aruba na aña 2007. Debi na e gran exito di su prome hotel na Aruba, e compania a dicidi di adkiri un di dos hotel, habriendo Riu Palace Antillas na aña 2014.

Hunto e dos hotelnan aki ta maneha mas o menos 25 mil huesped pa luna, cu un nivel di grado di ocupacion mas halto riba nos isla. Entre e dos hotelnan RIU na Aruba, nan ta emplea riba 800 trahado, brindando huespednan e miho nivel di servicio.



Aruba ta haya un Tienda di Ley

Iniciativa di Plataforma Hobennan Profesional di AVP



PLATAFORMA pa Hobennan Profesional t'e division mas nobo di partido AVP. Mescos cu otro institucionan di partido, e plataforma tambe a haci su compromiso na pueblo.

E plataforma aki ta consisti di hobennan profesional y studiantenan di diferente facultad di Universidad di Aruba.

E miembronan actual cu ta asistiendo e Facultad di Ley ta Juan Kelly, Jessica Burgos, Wendrick Cecilia, Wendert Cecilia, Timothy Fowler y Gerick Croes cu alabes ta un graduado caba di e Facultad Financiero Economico.

Di Facultad di Arte y Ciencia tin como miembro Victoria Sequera Lopez. Tambe tin miembronan profesional cu ta laborando caba manera e.o. Kamilah Dammers.

Parti di e compromiso ta activa un "Tienda di Ley" cu

lo ta encarga di cu e servicio comunitario di brinda asistencia legal na ciudadanonan di Aruba. Logicamente esaki lo ta conhuntamente y den cooperacion cu esnan cu tin experiencia caba riba diferente area di ley y cu coaching di lider partido AVP, mr. Mike Eman.

E proyecto di Tienda di Ley a keda concretisa diasabra ultimo den un reunion entre lider di AVP, mr. Mike Eman y e studiantenan di Universidad di Aruba (UA) cu ta forma e hala di Plataforma Hobennan Profesional (PHP).

Apertura oficial di Tienda di Ley ta diasabra 15 di september pa 2'or di atardi na Cas di Partido. Lo tin un ceremonia simbolico pa inicia e proyecto aki y lo atende esnan cu yega di biaha tambe.

Pueblo y alabes studiantenan di UA cu ta interesa den haya of brinda asistencia cu e proyecto aki ta bon bini.

Richard Wout “Den Wowo di Noord”

Pa; Addonsito Croes



RECIENTEMENTE a tuma lugar den MFA Noord su espacio pa expo, inauguracion di pintura y obranan unico.

E exposicion tin e nomber Den Wowo di Noord y ta dedica na Aruba su naturalesa y actividadnan.

Un total di 20 pintura a ser exponi cu e.o. e titulonan Juana, Cabrito bebe awa, Olde Molen, Cas di Titi, Den mi cushina, Set di Tennis, Aruba Caribbean Hotel.

E pinturanan tur ta preto cu blanco. Ademas di pintura tin tambe obra nan di hero dedica n’e lama di Aruba.

Tin e 7 piscanan proteha den nos awa nan tremendamente forma den un obra den cual señor Richard Wout a usa tecnicanan di welder pa trahe.

E otro obra ta dedica n’e deporte di windsurf. E ambiente bunita tipico a ser completa cu musica unico di e duo bao guia di Lucio Abath.

Den Wowo di Noord ta habri pa publico di Aruba for di ayera te na luna di november 2018.

Den presencia di su amigo y famia e expo a ser inaugura e siman cu a pasa. Tabata su yiu muher Dana Garcia cu a efectua e cortamento di sinta.

Directeur di MFA Aruba, Omar Harms a yama un y tur bon bini y a felicita señor Richard Wout cu su exposicion.

Mas informacion por ser haya na telefon 733 5353. Un y tur ta cordialmente invita pa pasa admira e obranan.



Team di Que Pasa Restaurant a gana di e 3 Aruba Bank Student Chef

E di tres competencia anual di Aruba Bank Student Chef Challenge 2018 a yega su final despues di 3 siman, unda 6 estudiante di Colegio EPI y EPB cu ta aspira pa bira chef a competi y a gana experiencia gastronomico pa bira futuro top chef.

E evento corporativo tabata “un anochi yena cu sabor” y den un ambiente ameno.

E obhetivo di e evento ta basa riba Aruba Bank su pilarnan strategico, cual ta We Build y We Care. Como comunidad ta importante pa nos motiva y inspira futuro generacion pa forma parti di nos sector di hospitalidad y turismo, specialmente den F&B. P’e motibo tambe ta importante p’e industria inverti den hoben y talentonan local.

E participantenan tabata Yilis Ho, Michelle Verploegh, Marielle Willems, Jeanmary Angela, Kayleigh Tromp y Xanee Erasmus. Nan tabatin e oportunidad pa siña traha hors d’oeuvres for di 3 chef conoci na Aruba di e restaurantnan Que Pasa, Café the Plaza y Fishes and More.

E aña aki e invitadonan a fungi come hurado y por a vota pa nan team di estudiante y restaurant favorito.

E ganado di e Aruba Bank Student Chef Challenge 2018 a bira e team di restaurant Que Pasa, consistiendo di Michelle Verploegh y Xanee Erasmus y chef Ries.

Aruba Bank ta felicita Michelle y Xanee pa bira e di 3 ganador di e competencia Student Chef Challenge 2018 y tambe tur participante pa sigui traha duro pa logranan meta.


Aruba Bank ta gradici e chefnan cu a yuda cada participante y sin laga afo su valioso clientenan corporativo pa asisti y forma parti.



Ceramento di caminda en conexion cu Aña Parlamentario

DEPARTAMENTO di Obra Publico ta informa pueblo di Aruba en general y specialmente nos automobilistanan di e siguiente. Awe diamars dia 11 di september 2018, Aruba ta celebra su aña Parlamentario. Pa haci esaki lo cera e caminda di L. G. Smith Blvd dilanti di Bestuurskantoor. E caminda lo ta cera

for di Adriaan Lacle Boulevard te na Weststraat. Ruta alternativa lo keda indica cu bari-cada y borchinan di aviso. E caminda lo ta cera di 7:30’or di mainta pa 12’or di merdia. En conexion cu e trabounan menciona Departamento di Obra Publico ta pidi pa tene cuenta cu e inconveniencianan



cu lo por surgi pa cual nos ta pidi nos disculpa.

“Trahando hunto pa un comunidad feliz” na Playa Pabao


DIRECTIVA di Centro di Bario Playa Pabao ta informa cu sra Abigael

Arends ta organisa diferente anochi di informacion den nos Centro.

Sra Arends ta un profesional certifica riba diferente area di desaroyo humano

tanto personal, labo-ral y spiritual. Nos comunidad ta conbibi cu proble-manan financiero, pareha, di famia di desaroyo di e mu-cha, hoben y adulto. Nos ta invitabo pa bin participa y in-verti den bo mes y enrikeciendo bo conocimiento riba temanan di interes. E anochinan di informacion ta diabierna 14 di sep-tember sigi pa 18 y 25 di september. E ultimo anochi di informacion ta 2 di october. Temanan cu lo wordo trata ta: De-

saroyo humano di bo yiu, solucionan conflicto y com-partacion cu por es-cala negativamente y guia con pa maneha bo placa. E nochinan di infor-macion lo cuminsa pa 7’or pm y lo ter-mina pa 9’or pm. Lo cobra e suma di awg 25.00 pa anochi y esnan cu ta participa n’e 4 anochinan ta reciبي un certificado. Pa inscripcion y in-formacion por yama 740 8870 of 593 8470. Inverti den bo mes y participa na e anochinan di infor-macion.

<div><div></div><div>BANCO DI CARIBE</div></div> <div>OFFICIËLE KOERSEN TEN OPZICHTE VAN DE ARUBAANSE FLORIN</div> <div>GELDIG OP 7 Sep, 2018 EN TOT NADER ORDER</div>					
valuta		aankoop van publiek			verkoop aan
		bankpapier	wissels, CHQ's reischeques en overboekingen		publiek
Ned. Antil. Gulden	ANG	98.00	100.00	biljetten	100.20
Per ANG 100				chq./overboeking	100.00
Amerikaanse dollar	USD	1.77	1.78		1.80
Canadese dollar	CAD	1.33	1.35		1.37
Zwitserse frank (per 100)	CHF	184.21	184.93		185.73
Pond sterling	GBP	2.25	2.30		2.36
Japanse yen (per 10.000)	JPY	159.19	160.65		162.26
EURO (per 100)	EUR	204.88	206.75		208.83
Deense kroon (per 100)	DKK	26.74	27.46		28.26
Noorse kroon (per 100)	NOK	20.14	20.86		21.66
Zweedse kroon (per 100)	SEK	18.62	19.34		20.14

Aruba Malmok Runners cu nan competencia

'Never say you can't walk or run', te di 7 edicion



DIA 16 di september awor, 'Aruba Malmok Runners' (AMR) lo tene e di 7 edicion di su caminata: 'Never say you can't walk or run'.

Pa 6'or di mainta un grupo grandi di canado y core-do lo sali for di Fisherman's Huts na Malmok, p'asina core locual ta priminti di ta un di e caredan-an di mas ambiente di 2018.

Hopi cu conoce Beto y Jovita Maduro pa t'e motornan grandi tras di AMR y hunto cu e coachnan y tur bolun-tario di AMR ta priminti di ta un careda exitoso. AMR ta un club deportivo cu ta dedica hopi tempo na nos muchanan y tambe na hende grandi cu ta de-sea di practica e deporte di coremento.

Coachnan di e club ta dirigi e trainingnan a base bol-untario y ta duna tur di nan tempo p'asina inverti den e atletanan di e deporte di coremento.

Lo por participa den e categorianan: youth 2k run ta pa edadnan di 6-13 aña, 6k fun run ta pa edad di 14 aña bay riba y n'e careda mas popular cual lo t'e 10k run tambe ta pa 14 aña bay riba. E meta di AMR ta pa genera fondo pa nan club deportivo, p'asina por ofrece mas na nan atletanan durante full e aña.

Cu nos muchanan na curason, AMR ta invita tur core-do y canado registra p'asina forma parti di e 'Never Say You Can't Walk or Run' cu ta priminti di ta uno grandi y yen di ambiente.

Pa registra por bay online na: www.malmokrun.com of bishita e Facebook page di Aruba Malmok Runners pa



mas informacion y tambe p'e link pa registra: <https://fb.me/arubamalmokrunners>



Time Out

Awe e tres pugilnan, kendenan a haña un experiencia grandi na Brasil, caminda nan a train cu e seleccion di Brasil den boxeo

Royal Power Tat Fat Home Depot ta derota Superplus den Copa Noord 14-2

E famoso Torneo di Copa Noord 2018 organisa pa Tan-ki Leendert Giants a continua fin di siman riba veld di Centro di Bario Noord. Diasabra den oranan di atardi Royal Power a enfrenta Superplus. Royal Power ta sali fuerte den di promer inning anotando 6 careda y ta amplia e score den di dos inning cu 7 careda pa pone Superplus lomba contra muraya. Finalmente Royal Power ta gana cu score di 14 pa 2. Royal Power 14 careda, 16 hit, 2 eror. Superplus 2 careda, 8 hit y ta comete 3 eror. Alvaro Barrios el “cabayo de hiero” ta bay cas cu e victoria riba su number. Robert Henriquez kende a wordo releva pa Eldrick Maduro mester a conforma su mes cu e derota. Pa Royal Power a destaca na bate Gregory “Pilin” Krosendijk 4-3, Goiandrick Lacle y Kenny Hart ambos di 3-2. Jomark Flanegin 3-2 incluyendo un homerun den deep left, Dijendrick Croes di 3-3 cu un homerun y un base por bola y Franco Wouters di 4-2. Pa Superplus a luci cu e mader den man Samir Webb 2-2, Francel Bernardus 3-3 y Gregory Manuel 2-1. Weganan valido di Copa Noord ta continua diasabra y diadomingo awor riba veld di Centro di Bario Noord. Fanaticada di cada equipo y muy enparticular pueblo di



Noord ta keda cordialmente invita pa pasa tereno bin apoya boso equipo preferi y alaves goza den ambiente di deportivo.

Campeonato Heineken Fast Pitch di Aruba Softball Bond a continua **Predators ta derota The Prodigies y Celebrities ta gana Blackhawks**

CAMPEONATO Heineken Fast Pitch dedica na baluartenan Chin Thiel (q.e.p.d) y e trabuco Wiwi Maduro a continua riba veldnan na Pos Chiquito. Den categoria di A-Klas Predators ta derota The Prodigies cu score di 14-10.

Predators 14 careda, 14 hit, 3 eror y ta laga 5 coreador den circulacion. Prodigies 10 careda, 7 hit, 6 eror y ta laga 7 coreador na base.

Mihor bateadornan pa Predators ta Jossiel Jacobs y Chris Angela ambos di 4-2, Jomir Vrolijk y Ralph Dinzy ambos di 4-2 cu 2 rbi y un cuadrangular cada un, Frangelico Angela di 4-2 y Jeanuar Goeloe cu un homerun.

Pa Prodigies a destaca na plato Joward Croes 2-2, Urvin Paesch 4-2 cu 3 rbi y un cuadrangular, Danny Yarzagaray 2-1, Michael Giel di 1-1 y Nigel St Jago cu un homerun.

Nigel St Jago ta bay 5 inning tirando 114 lansamento regalando 8 base por bola, 3 strike outs pa un ERA di 7.00 seyando e victoria riba su number. Carl Danny Yarzagaray tambe ta tira 5 inning pa un total di 100 pitch permitiendone 7 careda limpi pa un ERA di 9.80 y mester conforma su mes cu e derota riba su number. Den di dos wega di anochi Celebrities ta derota Blackhawks 16-11.

Celebrities 16 careda, 9 hit, 3 eror y ta laga 6 coreador na base. Blackhawks 11 careda, 12 hit, 4 eror y ta laga 5 coreador den circulacion.

Mihor bateadornan pa Celebrities ta Ruwin Tromp 4-3 cu 2 rbi y un cuadrangular, Edwin Marin 1-1 kende porcierto tabata un bataso di cuater skina, Ozzi Webb 4-1 cu 3 rbi y un homerun, Rudy Dirks 2-1 y Jeremy Geerman di 1-1.

Pa Blackhawks a destaca na plato den causa perdi Leonardo Dirksen 3-2, Efraim Leon 2-1, Rodney Kelly di 4-2 cu 5 rbi y dos cuadrangular, Jeffim Jansen 3-2 cu un homerun, Giandric Tromp y Robert Maduro ambos di 2-1.

Gregory Manuel kende ta drenta releva Jeremy Geerman ta bay cas cu e victoria lansando 49 pitch permitiendone 3 careda limpi pa un ERA di 9.00. Efraim Leon



a tira 59 pitch permitiendone 8 careda limpi a wordo releva pa Robert Maduro, kende na su turno a wordo releva pa Rodney Kelly a bay cas cu e derota. Weganan ta continua diaranson awor riba veldnan na Pos Chiquito. Yega tereno bin apoya Bo equipo preferi.



Biaheronan pa Ulanda OJO!!!

Duana ta kontrolá 100% ekipahe den bodega bou di Schiphol



WILLEMSTAD. E Defensor di Pueblo na Ulanda si-
man pasá a manda un señal 'loud and clear' pa Minis-
ter di Finansa i hefe di Duana na Schiphol pa buska un
manera pa informá biaheronan ku ta yega Ulanda for
di nos islanan den Karibe, ku nan ta kontrolando nan
maleta for di den bodega bou di Schiphol.

*Anto ku e kontròl ta 100% pasobra no tin
eksepshon: maleta di mula i maleta di
minister, tur nan ta kontrolá!*

Ta p'esei ta un derecho demokratiko dje biahero di ta
informá ki ta pasa ku su maleta pa dje forma aki evitá
di transportá droga den maleta pasobra eliminá no por
eliminá e transporte di droga pa Ulanda.

Pero awor nan sa ku ta na nan kurpa nan tin ku plak e
droga pasobra den maleta nan ta kai sigur.

E bosero di Duana a priminti Defensor di Pueblo ku
nan lo informá pasaheronan ku yega for di islanan di

Ulanda den Karibe i e islanan Outónomo, ku ta kontròl
riguroso tin pafó di nan bista i den nan ousensia.

Tin komo un aña ku duana na Schiphol ta listra i habri
maleta den e bodega promé ku nan poné riba nachi pa
terminal di yegada. Si nan habri un maleta nan ta pone
un nota den dje pa informá e pasahero ku nan a listra
su ekipahe.

*Den pasado tabata 'scan' e maletanan
i si tabatin sospecho, nan tabata habri e
maleta den presensia di e pasahero.*

Sinembargo e sistema tabata krea filanan largu i pasa-
heronan bonafide tabata rabia i frustrá sigur despues di
un buelo di 9 ora.

De paso sea dicho ku nan ta kalifiká buelonan for di
Aruba, Boneiru i Korsou ku Sint Maarten igual ku
buelonan for di Surnam i Venezuela ku ta puntonan di
salida notorio pe kantidat di droga ku nan sa pone a
bordo.

E atvertensha no ta algu liviano pasobra tabatin dife-
rente reklamo ofisial di biaheronan ku a sali Korsou pa
Schiphol i a nota ku a habri su maleta i a haña un nota.
E kos aki ta violashon di su privasidat i despues ku
varios hende a reklamá serka defensor di Pueblo, esaki a
drenta den akshon pa bisa duana pa avisá pasaheronan.
Duana no tabatin problema ku e reklamo pasobra lei ta
outorisá nan pa habri maleta pa kontrolá.

E hecho ku nan ta kontrolá e maletanan den bodega no
ta kontra lei.

Defensor di Pueblo tampoko a mira problema pa listra
maleta den bodega tantu pa motibunan di siguridad
komo buskando kontrabanda.

Duana a splika Defensor di Pueblo debidamente kende
a suplika pa hasi e kontròl mas transparente posibel pa-
sobra ta mas korekto pe pasahero sa di antemano kiko
por pasa ku su maleta ora e ta fuera di su bida.

Duana tin un pagina digital kaminda tur hende por lesa
esaki i tin un app pa lesa e reglanan di duana mientras
ku na entrada di e terminal di yegada nan ta pone un
bòrchi ku tin 100% kontròl.

Atlantis Adventures a haña premio di Carnival Cruise Line



WILLEMSTAD – Resientemente Carnival Cruise Line a duna Atlantis Adventures Curaçao e prestigioso premio “Caribbean’s Leading Tour Operator” award pa nan tremendo trabou realisá den 2017. Atlantis Adventure Curaçao, tantu staf i personal ta sumamente orguyoso ku un kompania prestigioso manera Carnival Cruise Line a duna nan e premio aki.

Den pasado resien ya kaba Atlantis Adventure Curaçao a yega di gana e prestigioso premio aki na un okashon esta na 2015 i awor ta pa di dos biaha ku nan ta gana esaki na 2017.

Atlantis Adventure Curaçao a kuminsá operá riba nos Isla na 1995 komo Shorex i na 1999 e nòmber a kambia den loke ku e ta awe, esta Atlantis Adventure Curaçao.

Pa Sra. Edmee Isidora, Manager di Atlantis Adventure Curaçao ta un honor ku nan por a gana e premio aki. Esaki ta resultado di e servisio di kalidat ku nan guia ta duna na e turistanan ku bishita nos Isla, kombiná ku



disiplina enorme i ku tournan di promé klase.

Atlantis Adventure Curaçao ta gradesí tur su guianan, su shofùnnan i tambe otro personal ku a kontribuí pa nan por a bini na remarke pa di dos biaha risibí e premio aki.


Temporada 2018/2019 ta den porta, i Atlantis Adventure Curaçao lo sigui ku e mesun bon trabou pa asina ei bende Kòrsou na un manera profeshonal.

Un detencion pa ladronisia di auto

WILLEMSTAD - Diadumingu 9 di sèptèmber 2018, alrededor di 00.58 or di madrugá, Central di Polis a ricibí notificacion cu tin un auto di huur di un compania cu a wordo hòrtá, y cu a keda señalá na un cas riba Sero Loraweg.

Mesora a dirigí un unidad policial n’e cas caminda a bin topa cu e auto di e compania. N’e sitio a detené e hòmber A.L.O. nacé na Còrsou, di 26 aña di edad, como sospechoso di ladronisa di auto.

A presentá e sospechoso dilanti di un Fiscal auxiliar kende a ordená su encarcelamento pendiente di mas investigacion.





Klientenan di SDKK ta yuda drecha buki pa skol Mgr. Willem Ellis

WILLEMSTAD – ‘Realisando e máksimo potensial di Kòrsou’: asina aki Sentro di Detenshon i Korekshon Kòrsou - Gobièrnu di Kòrsou (SDKK) ta sigui buska aliansanan positivo pa krea oportunidatnan balioso pa esnan ku ta detené den e instituto por demostrá nan talentonan i asina tambe duna bèk na komunidat di Kòrsou.

SDKK i gerensia di e skol Mgr. Willem Ellis a uni forza pa mustra e balor di traha huntu. Un grupo di hóben- i damanan ku ta sintando nan kastigu den SDKK a pone nan mes disponibel pa yuda drecha buki nan pa e skol ya ariba menshoná.

E klientenan aki ku ta fiel bishitante di e biblioteca den SDKK, ta di opinion ku nan ta hañá importante pa por duna nan aporte di e forma aki na promé lugá na e muchanan di skol Mgr. Willem Ellis, pa asina nan por sigui lesa e buki nan.

Na di dos lugá, nan ta yuda aportá na un futuro positivo pa e muchanan. Komo ku situashon finansiero di Kòrsou no ta masha bon nan ta dispuesto pa saka man i yuda otro.

Sigur ora ta trata di salvaguardiá e desaroyo di nos mucha-, hóbenan, nos futuro generashonnan.

E klientenan a duna di konosé ku niun mayor lo no ke mira nan yu(nan) será den SDKK. Pa evitá esaki ense-



ñansa di nos mucha- i hóbenan ta hopi importante. En total ta trata di mas òf ménos 1320 buki ku mes- ter wòrdu drecha. Apénas e proyekto aki a inisiá i ya kaba tin mas petishon a drenta serka Tim di Maneho di SDKK pa por yuda otro skolnan.

Finalmente e konseho di e klientenan di SDKK pa e muchanan di skol Mgr. Willem Ellis ta: “Sigui hasi bosnan bèst na skol i focus riba pensa positivo, aktua positivo i siña di otro pa asina Kòrsou por ta orguyoso di bosnan”.

Mas caso di menasa

WILLEMSTAD - Diadomingo 9 di sèptèmber 2018, alrededor di 08:52 or, Central di Polis a dirigí un patruya na un kas na Weto pa un caso di menasa. For di un investigacion preliminar cu Polis a realisá n’e sitio, e dama víctima a declará cu durante di un discusion cu su casá, esaki lo mester a basha gasolin riba e kas pa peg’é na candela. En coneccion cu e menasa aki Polis a detené e casá, e hòmber sospechoso S.P. nacé na Còrsou di 43 aña di edad pa menasa. A presentá e sospechoso dilanti di un Fiscal auxiliar



kende a ordená su encarcelamento pendiente mas investigacion.



Un detencion pa menasa

WILLEMSTAD - Diadomingo 9 di sèptèmber 2018, alrededor di 10.23 or, Central di Polis a dirigí un patruya na un cas den Amerikanenkamp pa un caso di menasa. For di un investigacion preliminar cu Polis a realisá n'e sitio, e dama víctima a declará cu durante di un discusion cu su casá, esaki lo a menasé di lo e dal'é. En conecion cu e menasa aki Polis a detené e casá, e hòmbler sospechoso R.A.R. nacé na Colombia di 60 aña di edad pa menasa. A presentá e sospechoso dilanti di un Fiscal auxiliar kende a ordená su encarcelamento pendiente mas investigacion.



Lema dje siman aki

“Konstruyendo un komunidad salú pa un i tur”

WILLEMSTAD- Di 8 pa 14 di Sèptèmber ta Wellness Week.


Siman di salú i bienestar.

Tema di e aña aki ta “Konstruyendo un komunidad salú pa un i tur”. pasobra gobiernu ke pa ke pa e pueblo di Korsou ta konsiente di nan salú.

Wellness ta un estado di salú i bienestar ku kontinuantemente ta trese e balansa den nos bida i tambe e kresementu komo persona.

Esaki ta enserá tuma desishonnan mas konsiente pa asina biba un bida mas largu i salú. Wellness ta mas ku solamente, ta liber di malesa, e ta enserá un proseso kontinuo di kambio i kresementu.

Kada persona por alkansá un nivel di salú optimal na momentu ku e persona siña komprondé kon pa mantené i mehorá kada dimenshon i tambe krea e balansa



nesesario.

Dunando mas informashon tokante e tema di wellness por yuda hasi nos pueblo mas konsiente di nan salú netamente pa logra e estado di wellness. Buska informashon i aseptá e konsepto di wellness pa asina traha pa kombertí bo mes den “e ABO mas salú posibel”.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444



Internacional

Insólito i humiyante

Air Antilles a laga Sint Eustatius for di nan destinonan

ORANJESTAD. Di akuerdo ku un detaye ku BES-Reporter a revelá diadomingo, St. Eustatius ta e uniko isla ku no ta aparesé riba e lista di destinonan pa kual e kompania Air Antilles ku tin akuerdo di koperashon ku Winair.

Air Antilles tin un revista ku nan ta reparti pa nan pasaheronan i kaminda nan ta promové tur nan destinonan kualnan ta Saba, St. Kitts, Nevis & Tortola ku ta destinonan di Winair tambe.

No solamente ku a laga St. Eustatius for di e lista di destinonan nobo sino ku e no ta riba e lista di tur destino ku e kompania ta sirbi.

Winair, Air Antilles i LIAT resientemente a djmoin forsa pa sirbi tur e destinonan aki bou di un nomber ku yama CaribSky Alliance.

E hecho ku St. Eustatius no ta riba e lista ta perhudiká e isla pasobra biaheronan ku ta bula riba e ruta Korsou



pa Sint Maarten i riba e ruta di Korsou, Aruba i Bonairu no ta ku nan por yega Sint Eustatius.

E pregunta ta keda: ta un eror di redakshon of ta expresis verbis a laga nan afó.

Èks notario Gachi Gijsbertha a falsifiká dokumento pa pareha Buncamper

PHILIPSBURG. Den e kaso kaminda Abogado General a pidi kastigu di prison kondishonal pe pareha Buncamper-Molanus, no a hasi menshon di un eventual apelashon di èks notario Gachi Gijsbertha kende a falsifiká e dokumentonan pe pareha por a hasi negoshi ku tereno di gobiernu na Sint Maarten.

Pa esei a kondené na 240 ora di trabou fòrsá.

Doño di St. Maarten Building Supplies N.V., Ivan Havertong a haña un kastigu di tres luna kondishonal di 120 ora di trabou fòrsá.

Pa ironia dje kaso e persona sentral den e chanchuyo ku tereno di gobiernu, direktor di Eco Green N.V.L, a sali kompletamente liber pasobra no por a proba sin duda ku e tabata konsiente dje ròl ku nan a lage hunga. E kousa pa tantu kastigu asina ta pida tereno na Soualiga Road ku e pareha a haña na erfpacht i ku nan a haña riba kontrat a largo plaso bou di kondishon ku

nan no por alkilá e tereno ku otro hende.

Anto nan a hasi eksaktamente esei pero di tal manera ku nunca nan lo mester a paga belasting riba e entada. Nan a skonde dokumento pa Korte i dje forma ei a gana NAf. 635,000 plus un pakete di akshon ku nan a bende pa US \$1,145,000 evadiendo pago di 80.000 florin na belasting.

Nan tin gran chèns ku Hustisia lo ekspropiá e terenonan i e sèn.

Na final tur hende a tira falta riba èks notario Gachi Gijsbertha kende nan a konsiderá komo un notario veterano ku hopi eksperensha.

# 1 <i>ONLINE</i>	
Tel: 583-1400	
Fax: 583-14444	
Facebook: www.facebook.com/awemainta	
Website: www.awemainta.com	
E-mail: noticia@awemainta.com	

Servicio pa
Comunidad

AWEMainta

Emergencia

Brandweer 911

Polis 100

Polis Oranjestad 102

Polis San Nicolas 104

Polis Santa Cruz 105

Polis Shaba 107

Polis Tipline 11141

Ambulance San Nicolas 584-5050

Ambulance Sasaki 582-5573

Ambulance Wayaca 582-1234

Hospital 527-4000

Centro Medico San Nicolas . 524-8833

SVB (AO-Ziekmelding) 527-2782

Botica na Warda

Pabou di Brug:

Paradera

Pariba di Brug:

Seroe Preto

Dokter na Warda

Pabou di Brug:

-

Pariba di Brug:

Servicionan

ELMAR Storingdienst 523-7147

SETAR Storingdienst 117

Digicel 145

WEB Storingdienst 525-4600

Reina Beatrix Int'l Airport 524-2424

Serlimar 584-5080

Arugas 585-1198

Guarda Costa 913

Funeraria

AD Patres 584-2299

Aurora 588-6699

The Olive Tree 582-0000

Fundacion

Rode Kruis Aruba 582-2219

FADA 583-2999

Fundacion Respeta Mi 582-4433

Fundacion Guia Mi 587-1677

Muhe den Dificultad 583-5400

Telefon pa Hubentud 131

Centro Kibrahacha 588-3131

Stichting Bloedbank 587-0002

Mary Joan Foundation 588-9999

Koningin Wilhemina Fonds ... 582-0412

Fundacion Pa Nos Muchanan.. 583-4247

Cas Editorial

The Media Group

Margrietstraat #3

Oranjestad, Aruba

Tel: 583-1400 Fax: 583-1444

Orario di Oficina

Dialuna - Diabierna

8am - 5pm

Cuenta di Banco

CMB #22982600

E-mail

Redaccion: noticia@awemainta.com

Aviso: aviso@awemainta.com

Subscribi na: notica@awemainta.com

Director

Victor “Toko” Winklaar

Victor R. Winklaar

Royal Aurora
Funeral Home & Crematory

Tata, den bo man mi t'entrega mi spiritu.
Salmo 31:1,2
Cu inmenso tristeza na nos curazon, pero agradecido pa tur
loke e la nifica pa nos, nos ta participa cu a bay drumi den
brazo di senor:

ANGELA LUYDENS-
GEERMAN

Cariñosamente jama: “ Eli”
21 september 1954- 6 September 2018



Na number di :
Esposo: Robert Luydens
Yiunan: Randolph Luydens
Angelique Luydens Y Giangelo Laclé

Nieta stima:Angelly Laclé
Stima mescos cu nieta y nieto: Giannylaine y Giandrick Laclé

Mayoman difunto: † Evaristo y
† Angelica Geerman-Boekhoudt

Rumannan:
Emma y Loreto Paskel y famia
† Margriet y Alberto Kelly y famia
Philomena y Antonio Ruiz y famia
Effie y † Reynaldo Tromp y famia
Reina Geerman

Tanta:
Vda. Annie Maduro y famia

Cuña y swanan:
Roland Luydens, Joyce y famia
Ingrid y Pedro Ras y famia
Tito Luydens y famia
Tina Luydens
Maureen Croes y famia

Sobrinonan:
Roland Paskel y famia, Giovanni Paskel y
famia, Sharine Henriquez-Kelly y famia, Milaidy Hoek-Kelly y
famia, Cheryl Ruiz y famia, Geordino Ruiz y famia, Shamila
Tromp y famia, Lucienne Tromp, Ronald Tromp, Susan Jacobs
y famia, Jeritza Ras y famia, Indra Ras, Richard Luydens y
famia, Sierra, Richenel, Renell Luydens, Myron, Cheri-Ann,
Shadienne

Sobre sobrinonan stima: Candice, Preston, Elise, Celeste,
Tristan, Julian, Shaun, Nathan, Aidan, Ryson, Seaghen,
Mlonzanin, Gabriel, Isafeli.
Iha stima: Cheryl Ruiz

Primo y primanan, comer y comper
Bisiña jega: Sra vda. Mena Frans
Amiga di cas: Safira Becker

Famia: Luydens, Geerman, Lacle, Paskel, Kelly, Ruiz, Tromp,
Lindeborg Croes, Webb, Boekhoudt, Navas, Dabian,
Feliciana, Yarzagaray, Erasmus, Wouters, Lacle, de Mey,
Rasmijn, Maduro, Arends, Arrindell, da Costa, Marchena,
Smith, Rosel, Angela, Garcia, Lee, Quijada, Eman, Franken,
Willems, Mansell, Gordijk, Frans, Bethancourt, Alders, Kock,
Vlake, Wemet, Mijer.

Ex-colleganan di La Linda

Ta invita tur amigo, amiganan, bisiñanan y conocirnan pa
acompañá nos defunto stima na su ultimo lugar di sosiego.

E acto di entierro ta tuma lugar diamars 11 di September 2018
na Misa Santa Anna na Noord. Nos difunto stima lo reposa
den Misa for di 2'or di atardi, respons ta cuminsa 4'or.

Adres pa condolencia: Royal Funeral Home, Cumana 44
dialuna 10 di September 2018 di 7'or pa 9'or di anochi.

Enbes di flor of krans lo tin un box disponibel pa Edmund
Harms Foundation.

Nos ta lamenta cu despues di entierro nos lo no por ricibi
bishita di condolencia na cas. Nos ta pidi nos disculpa si nos
por a lubida un of otro famia den nos tristeza.

Sentensia dia 15 di oktober

Den kaso di pareha
prominente pa froude i
evashon di belasting

PHILIPSBURG. Dia 15 di oktober
Korte di Hustisia Komun lo dikta sentensia
den e kos dje pareha di Sint Maarten, èks
minister
Maria Buncamper-Molanus (51) i su kasá
kende tabata direktor di Vivienda i Planifi-
kashon i Infrastruktura, Claudius Buncam-
per (55).
Djabierne ultimo e tribunal a trata nan kaso
i nan a insisti ku nan ta inosente di froude i
evashon di belasting.
Abogado General tabatin otro opinion: “Ta
tras di plaka nan tabata i US\$ tabata nan
dios”.
Den promé instansha e pareha a haña un
kastigu di 12 luna di prison kondishonal i
240 ora di trabou fòrsá.
Den promé instansha fiskal a pidi 18 luna
di kastigu di prison di kual 6 kondishonal
pe pareha pero Abogado General no a pidi
pa manda nan presu.
E kaso ta drei rondó di un chanchuyo ku
tereno di gobiernu ku e homber a laga traha
riba nòmber di su kasá kende tabata min-
ister i pa despues pasa e tereno pa algun
mion dòler pa un otro kompania.

Volkskredietbank van Aruba

ta participa fayecimento di



sra. Angela Luydens-Geerman

Mama di nos colega Randolph Luydens.


VKB kier a manda palabranan di profundo
condolencia y forsa na esposo, yiunan y demas
famia den e momentonan difcil aki.



"LO MI BIBA DEN BO TABERNACULO PA SEMPER. LO MI TUMA REFUGIO BAO DI BO HALANAN."

—SALMO 61:4

A FAYECE CRISTIANAMENTE NOS ESTIMADA:



SRA. VIUDA ALICIA GEERMAN-BOEKHOUDT

MIHOR CONOCI COMO ISHA
26 OKTOBER 1927 – 03 SEPTEMBER 2018
VIUDA DI MICHIEL "BENNY" GEERMAN †

NA NOMBER DI YUNAN DI SU DEFUNTO CASA BENNY GEERMAN:
SHOME Y YOLANDA GEERMAN-SOLOGNIER Y FAMILIA NA HULANDA
ADY Y AURIN GEERMAN-BOYÉ Y FAMILIA NA HULANDA
HENRY Y BRITH GEERMAN-HANSEN Y FAMILIA NA HULANDA
GRETA Y ANTONIO KOCK-GEERMAN Y FAMILIA
RONNY GEERMAN Y FAMILIA NA HULANDA
TRUSIA Y KENNETH CORNET-GEERMAN Y FAMILIA NA HULANDA
LILIAN Y WILFRED GEERMAN-GEERMAN Y FAMILIA

SU RUMANAN:
SRA. VIUDA CLOTHILDA CROES-BOEKHOUDT
MARTINA BOEKHOUDT
JUAN BOEKHOUDT
SIRA Y SIRO VROLIJK-BOEKHOUDT Y FAMILIA
SRA. VIUDA MIA BOEKHOUDT-NAVAS Y FAMILIA

SU NIETONAN, NIETANAN, BISANIETONAN Y BISANIETANAN

SU SOBRINA Y SOBRINONAN

SU STIMANAN MAS SERCA:
ADELAIDA KOCK, TRISTAN Y SEANNA
ANTONNETTE Y JEAN PIERRE ODUBER-KOCK, CODY Y AYDEN
SHANTY Y ROSALIE GEERMAN
GERALDINA Y LILIANA GEERMAN

SU AMIGANAN DI CAS:
SRA. VIUDA RUBY SOLOGNIER-GEERMAN Y SRA. VIUDA VERONICA DIJKHOFF-GEERMAN

SU KAPSTERNAN DI CAS: MENA ALDERS Y DAISY WELLER-GEERMAN

SU AYUDANTE: EVA WERLEMAN

SU BISINJANAN, CONOCIRNAN, RUMANAN DI IGLESIA SHADDAI Y DEMAS FAMILIA NA HULANDA Y MERCA: BOEKHOUDT, GEERMAN, SOLOGNIER, BOYE, HANSEN, KOCK, ODUBER, CORNET, KELLY, TROMP, CROES, VROLIJK, NAVAS, LACLÉ, DIJKHOFF

TA INVITA PA E ACTO DI ENTIERO CUAL LO TUMA LUGAR DIAMARS 11 SEPTEMBER 2018 FOR DI 9'OR PA 11'OR DI MAINTA NA AURORA FUNERAL HOME.
FOR DI 9'OR PA 11'OR TIN OPPORTUNIDAD PA CONDOLENCIA SIGUI PA UN SIRBISHI Y DESPUES SALIENDO PA SANTANA DI GOBIERNO NA SABANA BASORA.

ADRES PA CONDOLENCIA LO TA DIALUNA 10 SEPTEMBER 2018 FOR DI 7'OR DI 9'OR DI ANOCHI NA AURORA FUNERAL HOME.

NOS TA PIDI NOS DISCULPA SI DEN NOS TRISTEZA NOS POR A LUBIDA UN OF OTRO FAMILIA.

Presidente nobo di VBC ke kresementu ekonomiko di 2%

WILLEMSTAD. Entrante 1 september ultimo a tuma lugá renobashon di direktiva di Vereniging Bedrijfsleven Curacao ku e meta pa atendé interes di nan miembronan mihó aun.

Entrante e fecha menshoná Clark Russel a bira presidente kende un

di su metanan ku e ke logra ta pa reafirmá e papel di VBC komo sosio di konsulta ku gobiernu riba temanan sosial i finansiero i maneho ku ta toka sektor empresarial.

Otro meta ta pa logra un kresementu ekonomiko di 2% pa aña mediante eliminashon di trabanan burokratiko i pa mehorá e klima di invershon.

E direktiva nobo ke promové un sistema di enseñansa di kalidat ku ta kumpli ku tur eksigenshanan di merkado.

Mester tin bon gobernashon di punta pa punta i mester garantisá siguridat di nos komunidad pa asina drecha i garantisá un bon klima di bida riba nos isla.

E direktiva nobo ta konsisti di presidente Clark Russell kende ta bin di sektor finansiero, vise presidente Daniel Hodge kende ta di sektor bankero i Reinald Curiel.

E otro miembronan ta:

Bas Kooyman, Herman Behr, Joop Kusters,

Omar van der Dijs, CHATA Gabriel (Boy) Magdalena, AD-ECK

Yak Baroud, (SKO) / DMO)

Wendell Bonafacio, (AAV)

Raymond Jamanika, (CICA)

Vinod Daswani, (CIBA)

Bestuurslid



Gradicimento / Invitacion

Pa medio di esaki famia de Cuba kier a gradici tur hende cu di un of otro manera a compañía nos na e entierro di nos difunto casa, tata y abuelo stima:



Norman de Cuba Sr.

Tambe un danki especial ta bai na tur e persona nan cu a yuda nos defunto e ultimo aña nan cu hopi dedicacion y pasenshi.

Alaves nos kier invita pa 1 Misa cual lo tuma lugar na Misa Birgen di Fatima na Dakota, diabierna 14 di September 2018 pa 7'or di anochi.
Bo(so) presencia lo ta altamente aprecia.



"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forsa".
Salmo: 23

Cu inmenso tristeza na nos curazon pero conforme cu voluntad di nos Señor nos ta anuncia e fayesimento di nos tata, welo, y ruman stima:



Donald Kock

Mihor conoci como "Bito"
*06-03-1943 - †08-09-2018

Acto di entierro lo wordo anuncia despues



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL